

## TUTÚ DÍHNA NUU NĚ CADÚHA TÉ PÈLÚ

*Té Pèlú cádũha-dé tutú sá cúú-xí cuè ñáyiú sàndáá iní ñáhá xì Yá Ndiõxí*

<sup>1</sup> Yúhú té Pèlú ní tendaha ñàha Xítóhó Jesucristú xícá cùu-í càhá<sup>n</sup>-í tnúhu-gá, te cádúha-í tutú-a sá cúú-xí nchòhó ñáyiú xínchíté nuu ndècu distritú Pòntó, ndihì distritú Gàlaciá, ndihì distritú Capadociá, ndihì distritú Àsiá, ndihì distritú Bìtiniá.

<sup>2</sup> Chi Dútú Ndiõxí ní cachí-gá sá cúú-ndó dèhe-gá ndéé cútñahá vátá ngãva-gá ñuyíú, te Espiritú-gá ní quide-xi ndècu yíñuhu-ndo núú-gã vitna. Te ní cachí-gá sá cúú-ndó dèhe-gá cuèndá tñi-ndo nchàa tnúhu càhá<sup>n</sup> Xítóhó Jesucristú, ndihì cuèndá nduu ndoo nduu nine iní-ndó, chi ñi cuèndá-á<sup>n</sup> ñí xíhí Xítóhó Jesucristú. Te xicá<sup>n</sup> táhù-í núú Yá Ndiõxí sá ïo na chìndee chitúu ñaha-gã xii-ndo cuèi vitna te cuèi núú cuàhá<sup>n</sup> núú vèxi, te ñi-ni-gá ná cádá te ïo váha cuu iní-ndó cùndecu-ndo.

*Tnúhu ndee iní sá ndécú ndihì ñáyiú sàndáá iní ñáhá xì Yá Ndiõxí*

<sup>3</sup> Te vitna chí ná càchí-ó sã ïo càhnu cuu Yá Ndiõxí Yaá cúú Tátá Xítóhó Jesucristú, chí ñi-gá ïo ní cundàhú iní ñáhá-gã xii-o ñũu xíá<sup>n</sup> ní quide-gá sá nchóó ñí nduu-o dàtná ñ<sup>n</sup> ñáyiú saa vitna. Te duca<sup>n</sup> ñí quide ñaha-gã xii-o cuèndá sá Xítóhó Jesucristú ní xíhí-gá te ní ndoto-gá. Te cuèndá sá ñí nduu-o dàtná ñ<sup>n</sup> ñáyiú saa, xíá<sup>n</sup> ní ngúndecu ndihì-o tnũhu ndee iní <sup>4</sup>sá cùndècu ndihì-o-gá ñi caa ñi quíhí<sup>n</sup>, chí

duca<sup>n</sup> ñi cachí-gá cunduu. Te yàcá<sup>n</sup> vá quìní-gá-ó ñi ñ<sup>n</sup> sá cuèhé sá dúhá, te ío cudíí ñí-ó cùndecu-ò ndihí-gá ñi caa ñi quíhí<sup>n</sup>. <sup>5</sup> Te sá sàndáá ñí-ó Yá Ndiöxí, núu xíá<sup>n</sup> coto ñaha-gã xii-ò ndèé ná sàá nduu nàquehe<sup>n</sup> cuendá ñáhá-gã chi ío càhnu cuu-gá.

<sup>6</sup> Te xíá<sup>n</sup> ío cudíí ñí-ndó ndècu-ndo, te cuèi nándi ndòho-ndo ndecu-ndo dico sacú-ñi nduu duca<sup>n</sup> ndòho-ndo. <sup>7</sup> Te òré ná cáda càhnu ñí-ndó yáha-ndo nchàa sá ná càda ñaha ñáyiu xii-ndo, te duca<sup>n</sup> te cutnùní sàndáá ndisa ñí-ndó Yá Ndiöxí, te sá dúcá<sup>n</sup> sàndáá ñí-ndó Yá Ndiöxí ío-gá váha dàcúúxí dǐhú<sup>n</sup> cuáá<sup>n</sup> chi xíá<sup>n</sup> ñá túú cudíi-xi. Te cuèi duca<sup>n</sup> dico xito ndeé nàhí-ñi-güedé núu ndisa cùu-xi dǐhú<sup>n</sup> cuáá<sup>n</sup>. Te duca<sup>n</sup> sǎtnahá-xi cùu nchohó cuendá nchaa sá ndòhó-ndó, te na sàá nduu quixi tucu Xítóhó Jesucristú te cúñaha-gã xii-ndo: “Ío váha ñi quide-ndo, te vitna ío càhnu cuu-ndo, te tàú-ndó núcúndecu váha-ndo”, duha cúñaha-gã xii-ndo.

<sup>8</sup> Te vitna ío cùu ñí-ndó Xítóhó Jesucristú cuèi vátá quìní-gá-ndó-gã, te duca<sup>n</sup> ño sàndáá ñí-ndó-gã, te ío cudíí ñí-ndó te súúní ñi ñá cutnùní ñí-ndó ñasa cunduu tnúhu cáhá<sup>n</sup>-ndó sǎ dúcá<sup>n</sup> ño cudíí ñí-ndó <sup>9</sup> cuendá sá ñi naníhí tàhú-ndó, chi ñi sàndáá ñí-ndó-gã.

<sup>10</sup> Te cue téé ñi xóo cáhá<sup>n</sup> tnúhu Yá Ndiöxí ndeé sanaha ñi cachí-güedé nàcuáa cada-gá cundàhú ñí ñáhá-gã xii-ò vitna. Te cue téé-á<sup>n</sup> ño váha ñi dácuáhá-güedé nàcuáa cada Yá Ndiöxí dàcácu ñi-hnu ñaha-gã xii-ò vitna. <sup>11</sup> Te Espíritú Xítóhó Jesucristú ñi ngúndecu ndihí cue téé-á<sup>n</sup> ñi xáha<sup>n</sup>-xi xì-güedé nàcuáa ndoho-gá, te ñi xáha<sup>n</sup> tùcu-xi

xii-güedé sá sätá ná yăha ndoho-gá te ío cunuu-gă ndîhi Yá Ndiöxí. Te ío ní sani iní-güedé nŭu ná nduu sǎa duca<sup>n</sup> càda-xi, ndîhi nchaa nándi-gá cúú sǎ cáda-xí. <sup>12</sup> Te Yá Ndiöxí ní xáha<sup>n</sup>-gă xii-güedé sá ncháá tnŭhu váha càhá<sup>n</sup>-güedé vá cúú-xí cuendá mée-güedě, chi cuendá nchoo cuè ñáyiú ndècu ñuyíú-a vitna cùu-xi. Te ñiú-ni tnúhu-á<sup>n</sup> cúú tnŭhu càhá<sup>n</sup> nchúhú cue tée càhá<sup>n</sup> tnúhu Yá Ndiöxí núú-ndó. Te Espíritú sá ñi taxi Yá Ndiöxí ndécú ndîhi-o chindee ñaha-xi xii-ndí càhá<sup>n</sup>-ndí tnúhu-gá. Te cue espíritú xínú cuèchi núú Yă Ndiöxí ío cuení-xi quini ndáá-xi nchaa nàcuáa cuáhá<sup>n</sup> tnúhu-á<sup>n</sup>.

*Yá Ndiöxí càchí-gá sá cáda-ó mée-ni sá văha*

<sup>13</sup> Te sá dúcá<sup>n</sup> ío váha ní quide ñaha Yă Ndiöxí xii-ndo xǎ<sup>n</sup> xíní ñŭhu-xi ío váha cuáha-ndo cuendá nàcuáa cundecu-ndo te vá cání iní-ndó càda-ndo ni ñ<sup>n</sup> sá cuèhé sá dúhá, te ío quindáá iní-ndó sǎ Yă Ndiöxí cada váha ñaha-gă nduu na quixi tucu Xítohó Jesucrístú. <sup>14</sup> Te ío tñi-ndo nchàa tnúhu càhá<sup>n</sup> Yă Ndiöxí, te vá cúhú<sup>n</sup>-gă iní-ndó nándi sá cuèhé sá dúhá sǎ ñi xúhu<sup>n</sup> iní-ndó cŭtnàhá vátá cundecu-gá-ndó ìchi-gá te ñi vǎ cáda-ndó. <sup>15</sup> Te cada-ndo mée-ni sá văha cundecu-ndo dàtná quidé mée Yá Ndiöxí Yaá ní cáhá<sup>n</sup> ñáhá xii-o cundecu-o ndîhi-gá. <sup>16</sup> Te càchí-gá núú tütú-gá: “Cada-ndo mée-ni sá văha cundecu-ndo, chi duca<sup>n</sup> quide yúhú”, duha càchí-gá núú tütú-gá.

<sup>17</sup> Te Yá Ndiöxí cada ndáá-gá cuèchi nchaa ñáyiú, te vá cáda cuendá-gá cuèi náí ñáyiú cùú-yu, te nchòhó càchí-ndó sǎ díú Tătá-ndó cùu-gá te ndáá, núú xǎ<sup>n</sup> xíní ñŭhu-xi canehe-ndo sá yíñŭhu núú-gă ndi nchàa nduu cundecu-ndo ñuyíú-a. <sup>18</sup> Te ñiú-gá

ní dácăcu nihnu ñaha-gă xii-ndo ì<sup>n</sup> ichi sá ñà túú nàndíhi ní sanu ichi ñaha cuè ñaní tnáhá-ndó nǐ xindecu ndéé sanaha nǐ cùu, te nchòhó sa nàha-ndo sá sǎ dúcá<sup>n</sup> nǐ quide ñaha Yá Ndiöxí ní dácăcu nihnu ñaha-gă xii-ndo ìchi-á<sup>n</sup> ñà túú ní chăhu-gá ni ì<sup>n</sup> díhú<sup>n</sup> cuáá<sup>n</sup>, te ni ì<sup>n</sup> díhú<sup>n</sup> cuixí<sup>n</sup> sá ndíhí nihnu ñuyíú-a cuendá-ndó. <sup>19</sup> Chi Xítóhó Jesucristú ní quixi-gá ní sati níñí-gă, te ní xíhí-gá núú cùrúxí cuendá sá nchóó nàníhí tǎhú-ó, te cùu-gá dàtná ì<sup>n</sup> mběé quiti ío váha iní-xi, quiti cãndoo canine. <sup>20</sup> Te duca<sup>n</sup> nǐ ndoho Xítóhó Jesucristú, chi duca<sup>n</sup> tnàhí ndéé tnuní ndoho-gá ndéé cùtnáhá vátá ngăva-gá ñuyíú. Te duca<sup>n</sup> nǐ yáha-gá cùtnáhá ní quixi-gá òré vitna cùmání sǎá nduu nàa ñuyíú-a cuendá nchoo cùu-xi sá vǎha xii-o vitna. <sup>21</sup> Te nchòhó sa nihí-ndó tnǔhu năcuăa ní yáha Xítóhó Jesucristú cùtnáhá ní quixi-gá ñuyíú-a, núu xǎ<sup>n</sup> sàndáá iní-ndó Yá Ndiöxí. Te Yá Ndiöxí ní dándótó-gă Xítóhó Jesucristú, te sátá nǐ dándótó ñàha-gá te ní cachí-gá sá ïo cǎhnu cuu Xítóhó Jesucristú. Te sá dúcá<sup>n</sup> nǐ cuu, xǎ<sup>n</sup> ío sàndáá iní-ndó Yá Ndiöxí, te ní taxi-gá tnúhu ndee ìní ndécú ndíhi-ndo sá sǎá nduu cùndecu-ndo ndíhi-gá ni caa ni quíhí<sup>n</sup>.

<sup>22</sup> Te Espíritú Yá Ndiöxí ní quide-xi te ní sándáá iní-ndó tnǔhu-gá, te xǎ<sup>n</sup> ní nduu ndoo ní nduu nine iní-ndó, te cùu iní tnáhá ndisa-ndo nacuăa ndècu-ndo ichi Yá Ndiöxí, te xìni ñuhu ndisa-xi sá ïo ni yùhu ni iní-ndó cùu iní tnáhá-ndó ì<sup>n</sup> ì<sup>n</sup>-ndo. <sup>23</sup> Te nchòhó ní nduu-ndo dàtná ì<sup>n</sup> ñáyiu saa sá cuendá tnúhu Yá Ndiöxí, te tnúhu-á<sup>n</sup> candeca-xi iní-ndó nǐ caa ni quíhí<sup>n</sup>, te vá ì<sup>n</sup> ndùu ndíhi nihnu-xi, te ñǎ díú cuendá ñáyiu ñuyíú-a ni ndùu-ndo ì<sup>n</sup> ñáyiu saa

chi cuèndá tnúhu-gá. <sup>24</sup> Chi núú tùtú Yă Ndiöxí cächí-xi:

Nchaa ñáyiú ndècu ñuyíú-a cùú-yu dàtná cùhú, chi cùhú-ă<sup>n</sup> tnaa-ni cùdí-xi te xihí-xi, duca<sup>n</sup> sãtnahá-xi cùú-yu.

Te nchaa sá ndécú ndìhí-yu cùu-xi datná ì<sup>n</sup> itá cùhú-ă<sup>n</sup>, chi itá-á<sup>n</sup> tnaa-ni tucu cùdí-xi te ndàhvá-xi, duca<sup>n</sup> sãtnahá-xi cùu nchaa sá ndécú ndìhí-yu.

<sup>25</sup> Dico tnúhu Yá Ndiöxí chi vá náá tnàhí-xi, chi duha-ni ndècu-xi, te ñiu-ni duha cundecu-xi ni caa ni quíhí<sup>n</sup>.

Duha cächí-xi núú tùtú-gá. Te ñiu tnúhu-á<sup>n</sup> ñí dãnèhé ñáhá nchũhú cue téé cãhá<sup>n</sup> tnúhu Yá Ndiöxí xii-ndo.

## 2

<sup>1</sup> Te xíă<sup>n</sup> xíní ñùhu-xi dañá-ndo nchaa núú sã cuèhé sá dúhá, te dañá-ndo ìchi tnúhu ndehnde, te dañá-ndo vã dándàhú-gá-ndó mèe-ndo sá quidé vãha-ndo, te dañá-ndo ìchi cuedú ínì, te dañá-ndo nchàa tnúhu yiti. <sup>2</sup> Te cada-ndo cuèndá sá cùú-ndó dàtná cue landú yíquí<sup>n</sup> vîtna sadi camá, chi landú-á<sup>n</sup> mee-ni sàdi-güexi te sãhnu-güexi. Te cada ínì-ndó sã dúcá<sup>n</sup> càda-ndo chi xìni ñuhu-xi sá ïo cuhu<sup>n</sup> ínì-ndó dàcuaha-ndo tnúhu Yá Ndiöxí, chi xíă<sup>n</sup> cùú-xí mèe-ni tnúhu váha, te duca<sup>n</sup> te cuita cuehnu nihnu-ndo ìchi-gá quíhí<sup>n</sup> ndéé ná sàá nduu cùndecu-ndo núú ndécú-gã. <sup>3</sup> Te duca<sup>n</sup> xìni ñuhu-xi cada-ndo, chi nchòhó sa ní cutnùnì ndisa ínì-ndó sã Yă Ndiöxí ïo váha ínì-gá.

*Xítóhó Jesucrìstú cùú-gã dàtná ì<sup>n</sup> yúú*

<sup>4</sup> Te ío nanducu ñihnu-ni-ndo Xítohó Jesucrístú Yaá quidé nàcuáa naníhí tǎhú-ó. Te ðiu-gá ní cuu-gá ðàtná ì<sup>n</sup> yúú sǎ ñà túú nàndihì sá cúú-xí ñǎyiu ñuyíú-a, chi ní dáquéé tǐhú ñáhǎ-yu xii-gá. Dico Yá Ndiǒxí ní cachí-gá sá Xítohó Jesucrístú cúú-gǎ ðàtná ì<sup>n</sup> yúú sǎ ïo-gá váha, chi ío cùnuu-gá.

<sup>5</sup> Te nchòhó sa ní naníhí tǎhú-ndó, te ío-gá chí nándùcu nihnu Yá Ndiǒxí cuèndá cuu ì<sup>n</sup>nuu-ndo cùndecu-ndo ndihì Espíritú-gá. Te núu duca<sup>n</sup> na càda-ndo te cuu-ndo ðàtná yúú vǎha dàcaa-güedé dava vehe, te cuu tucu-ndo ðàtná cue dútú ñǐ xinu cuechi núú Yǎ Ndiǒxí ndéé sanaha, nàcuáa ñǎ túú ñǎ cumání-ndó núú-gǎ, chi nchaa cue téé-á<sup>n</sup> ñǐ xóo cuáha ñaha-güedé sá ñǐ xóo nduu tǎhú-gǎ. Te nchòhó vitna tǎú-ndó càda-ndo nchaa nacuáa càhá<sup>n</sup>-gá, te nduu vétú iní-gá. Te duca<sup>n</sup> càda-ndo chi ndècu-ndo ndihì Xítohó Jesucrístú. <sup>6</sup> Te Yá Ndiǒxí càchí-gá núú tütú-gá:

Yúhú taxi ndecu-í ì<sup>n</sup> Yaá ñuú Sìon,

te cuu-gá ðàtná ì<sup>n</sup> yúú vǎha sá sánútnǐ-güedé xíquí cimièntú ì<sup>n</sup> vehe, chi yúhú ní cachí-í sá Yáá-á<sup>n</sup> ïo cunuu-gǎ.

Te nchaa ñáyiu quèndáá iní ñáhá xii-gá vá ì<sup>n</sup> ndùu ndixi cuéchi iní-yu sá dúcá<sup>n</sup> sàndáá iní ñáhǎ-yu xii-gá.

Duha càchí-gá núú tütú-gá. <sup>7</sup> Te nchòhó ñáyiu sàndáá iní ñáhá xii Xítohó Jesucrístú ío cùu iní-ndó-gǎ, te nchaa ñáyiu ñǎ túú sàndáá iní ñáhá xii-gá quidé-yu ðàtná càhá<sup>n</sup>-xi núú tütú Yǎ Ndiǒxí núú càchí-xi:

Yúú sǎ ñǐ dáquéé tǐhú cue téé dàcaa vehe, xǐá<sup>n</sup> cúú-xí yúú sǎ ïo-gá nándǐhì vitna.

Duha càchí-xi núú tütú-gá. Te yúú-ǎ<sup>n</sup> cada iní-ó sǎ cúu-xí Xítohó Jesucristú, chi ní dáquéé tǐhú ñáhá-güedé xii-gá. <sup>8</sup>Te càchí tucu-xi ìngá xichi núú tütú Yǎ Ndiǒxí:

Yúú-ǎ<sup>n</sup> nguñenu ñáyi te ndùá-yu.

Duha càchí-xi núú tütú-gá. Te tnúhu-á<sup>n</sup> quéé-xí sǎ ïo quide sǎá iní ñáyi núú-gǎ, chi ñá túú cuiní-yu tñí-yu tnúhu càhá<sup>n</sup>-gá, te duca<sup>n</sup> tñàhí ndéé tñuní sá ncháá ñáyi ñá túú cuiní tñí tnúhu càhá<sup>n</sup>-gá, te ïo cùu sǎá iní-yu núú-gǎ.

### *Ñáyi ndècu ndihí Yá Ndiǒxí*

<sup>9</sup>Te nchoo cùu-o ñáyi sa ní dáquéé dǐ<sup>n</sup> ñaha Yá Ndiǒxí xii-o cuendá cundecu-o ndihí-gá, te cùu-o dútú xínú cuèchi-o núú-gǎ, te mee-gǎ cúu-gǎ Yaá ïo cùnuu, te cùu-o ñáyi quide ndáá xǐndecu ichi-gá te cùu tucu-o ñáyi yǐndaha-gá. Te duca<sup>n</sup> ñá quide ñaha-gǎ xii-o cuendá sá cǔñaha-o xii nchaa ñáyi sá ïo càhnu cuu-gá, te ïo vǎi núú sǎ vǎha quide-gá, te dǐu-gá ní quide ní dáñá-ó ncháa ichi cuehé ichi duha ndècu-o ní cuu, te ní sanu ichi ñaha-gǎ xii-o ñ<sup>n</sup> ichi váha, te vitna cùtnuní iní-ó sǎ ïo càhnu cuu-gá.

<sup>10</sup>Te nchoo cùu-o ñáyi ñá túú ndècu ndihí Yá Ndiǒxí ní cùu, dico vitna ní ngúndecu ndihí-o-gǎ, te dàvá-á<sup>n</sup> vǎtá sàá-gá nduu càda váha ñaha-gǎ xii-o, dico vitna sa ní sǎá nduu quide váha ñaha-gǎ xii-o, chi ïo cùndahú iní ñáhá-gǎ.

### *Cada váha-o cùndecu-o cunu cuechi-o núú Yǎ Ndiǒxí*

<sup>11</sup>Te nchòhó ïo cùu iní ñáhà-í xii-ndo, te càchí tnúhu-í xii-ndo sǎ nchóó cùu-o datná cue ñáyi ndècu tñaduha ñ<sup>n</sup> ñuú, te duca<sup>n</sup> sǎtnahá-xi cùu-o

chi tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yá Ndiöxí táxí tnùní-gá, te xíǎ<sup>n</sup> càhá<sup>n</sup> ndàhú-í núú-ndó sǎ vǎ cádá-ndó ñi ñ<sup>n</sup> sá cuèhé sá dúhá sàni iní-ndó, chi nchaa xíǎ<sup>n</sup> ñá túú cùu-xi sá vǎha sá cúú-xí-ndó. <sup>12</sup> Te cada váha-ndo cùndecu-ndo núú nchàa ñáyíu ñá túú ndècu ichi Yá Ndiöxí, te cuèi na càhá<sup>n</sup> ñáyíu sá nchòhó nchìcú<sup>n</sup> nihnu-ndo ìchi cuehé ichi duha, dico quini-yu nchaa sá vǎha quide-ndo, dico na sáá nduu dándixi túu Yá Ndiöxí iní-yu sá ñà túú quide váha-yu ndécú-yu, te dává-á<sup>n</sup> cachí-yu sá quidé vǎha-ndo ndècu-ndo, te cada càhnú-yu Yá Ndiöxí.

<sup>13</sup> Te Xítohó Jesucrístú cuiní-gá sá nchòhó ío quindáá iní-ndó nchàa cue téé cùchiu<sup>n</sup> taxi tnuní ñáhá xii-ndo, te duca<sup>n</sup>-ni quindáá iní-ndó cuèi mee téé cùnuu vihi-gá yíndàha ñaha xii ñáyíu.

<sup>14</sup> Te duca<sup>n</sup>-ni quindáá iní-ndó nchàa dava-gá cue téé cùnuu, chi Yá Ndiöxí duca<sup>n</sup> ñi cachí-gá cunduu sá cuè téé-á<sup>n</sup> cada ndáá-güedé nchaa cuèchi ñáyíu quide cuehé quidé dùha ndecu, te cáhá<sup>n</sup> váha-güedé cuendá nchaa ñáyíu xíquide váha ndècu. <sup>15</sup> Te Yá Ndiöxí cuiní-gá sá cádá vǎha-ndo cùndecu-ndo cuendá nchaa ñáyíu ío ñi dǐquí-xi càhá<sup>n</sup> cuèhé cuendá-ndó sǎ ndécú-ndó ìchi Yá Ndiöxí vá ñihí-gá-yu tnúhu cáhá<sup>n</sup>-yu.

<sup>16</sup> Te nchòhó, Yá Ndiöxí ní quide-gá sá cúú-ndó ñáyíu cuu cada nàcuáa véxi iní mée-xí, dico ñá díú sǎ dúcá<sup>n</sup> ñi quide ñaha-gǎ xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sǎ cúú-ndó ñáyíu xínu cuechi núú Yá Ndiöxí. <sup>17</sup> Te canehe-ndo sǎ yíñùhu núú nchàa



ñáyi, ndihi núú tẽ cùnunu vihi yindaha ñaha xií-yu, te cuu iní tnáhá ndì mee-ndo nacuaá ndècu-ndo ichi Yá Ndiöxí, te ío canehe-ndo sã yĩñuhu núú-gã.

*Nchaa nàcuáa ndoho-o cùndecu-o ichi Xítóhó Jesucristú*

<sup>18</sup> Te nchaa nchòhó ñáyi xínu cuechi canehe-ndo sã yĩñuhu núú cuè patróo<sup>n</sup>-ndó, te quindáá iní-ndó càda-ndo nchaa chiu<sup>n</sup> tahu-güedé. Te ì<sup>n</sup>-ni càda-ndo núú cuè téé váha iní-xi, ndihi núú cuè téé ío cuihna iní-xi. <sup>19</sup> Te núú nchòhó ná càda ndee iní-ndó ndòho-ndo nchaa sã ñà túú tàú-ndó ndòho-ndo cuendá sã cuiní-ndó cùndáá-ndó núú Yá Ndiöxí ñá, te ío nduu vétú iní-gã. <sup>20</sup> Te núú nchòhó ní quide-ndo ì<sup>n</sup> cuéchi, te sàhni iní-ndó dándoho ñaha ñáyi xii-ndo, ¿te ná sã vãha cùu xiã<sup>n</sup>-i? Dico núú nchòhó ná cáda ndèe iní-ndó ndòho-ndo nchaa sã cáda ñaha ñáyi xii-ndo sã cuendá sã quidé-ndó sã vãha ña, te núú duca<sup>n</sup> na càda-ndo te cùu-xi ì<sup>n</sup> sã vãha núú Yá Ndiöxí. <sup>21</sup> Te Yá Ndiöxí ní cachí-gã sã cáda ndèe iní-ó ndòho-o nándi ndoho-o sã cuendá sã quidé-ó sã vãha, chi ío ní ndoho Xítóhó Jesucristú cuendá-ó, te duca<sup>n</sup> tàú-ó cànchicú<sup>n</sup> nihnu-o càda ndee iní-ó ndòho-o nándi ndoho-o, chi duca<sup>n</sup> nì quide-gã. <sup>22</sup> Te mee-gã ñà túú quide-gã ni ì<sup>n</sup> sã cuèhé sã dúhá, te ni ì<sup>n</sup> tnúhu ndehnde ñà túú càhá<sup>n</sup>-gã. <sup>23</sup> Te òré ní xóo cúcuèhé ñáhá-güedé xii-gã, te ñà túú ní xóo danchòcáva-gã tnúhu cuèhé, te òré ní xóo dandòho ñaha-güedé xii-gã, te ñà túú ní xãha<sup>n</sup>-gã xii-güedé sã ío ná cada ñaha-gã, chi núú ndáhá Yá Ndiöxí ní xóo nachihi-gã méé-gã, ndihi nchaa sã sání iní-güedé cada ñaha-güedé xii-gã. Te Yá Ndiöxí cúú-gã Yáá ío váha cada ndáá cuéchi nchaa ñáyi

na sàà nduu. <sup>24</sup> Te Xítóhó Jesucrìstú cúú-gã Yaá ní xíhí núú cùrúxí cuendá nchaa cuéchi nchoo ñăyiu ndècu ñuyíú-a. Te duca<sup>n</sup> ñí xíhí-gá cuendá nchoo dùu<sup>n</sup> duu<sup>n</sup> dañ-a-o nchaa ichi cuehé ichi duha, te cada ndáá-ó cùndecu-o ichi-gá. Te ní dánícuéhé ñáhá-güedě xii-gá, te sá dúcá<sup>n</sup> ñí ndoho-gá xíá<sup>n</sup> ní ngúndecu váha nchoo vitna. <sup>25</sup> Te nchoo cùu-o datná cue mběé cue quití ní xíta ni cùu, dico vitna ní tuha-o Xítóhó Jesucrìstú, te Yaá-á<sup>n</sup> cúú-gã dàtná ì<sup>n</sup> toli xító ñaha-gá xii-o vitna cuendá sá vã cuíta nihnu-o.

### 3

#### *Nàcuáa tàú ñáyiu tnăndaha cadá-yu cundecú-yu*

<sup>1</sup> Te nchaa nchòhó ñáyiu dìhí ní tñandaha ío quindáá iní-ndó yî-ndo cuendá sá núu ñá túú sândáá iní-güedé tnúhu Yá Ndiöxí te quindáá iní-güedé cuendá sá ndéhé-güedě quidé ndáá-ndó ndècu-ndo, te ni ñà túú xini ñuhu-xi cáhá<sup>n</sup>-ndó tnúhu-gá núú-güedě. <sup>2</sup> Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yîñuhu núú Yă Ndiöxí. <sup>3</sup> Te vá cání iní-ndó mēe-ni cunduu vii-ndo, te ndada-ndo dĩquí-ndó nàcuáa tàú-xi cunduu, te vá cání iní-ndó năndi canehe-ndo, te ni vã cání iní-ndó cuñhu-ndo mee-ni dóó văha sá ío vii ndáa. <sup>4</sup> Chi iní-ndó xini ñuhu-xi cunduu vii cunduu váha-xi núú Yă Ndiöxí cuěi vitna te cuěi núú cuăhá<sup>n</sup> núú vëxi, te cuu-ndo ñăyiu ío càhnu iní-xi, te núu duca<sup>n</sup> na càda-ndo te ío cuu váha iní Yă Ndiöxí. <sup>5</sup> Te duca<sup>n</sup> ío vii ío váha ní xínduu iní nchaa ñáyiu dìhí ní xíndecu ndéé sanaha, te ñáyiu-á<sup>n</sup> ío ní sândáá iní-yu Yá Ndiöxí te ní cudíú-yu núú-gã, te ní tñí-yu nchaa tnúhu ní

cáhá<sup>n</sup> yí<sup>n</sup>-yu. <sup>6</sup> Te duca<sup>n</sup> ñí xóo cada ndíi Sǎrá ní xóo quíndáá iní ndíi yí<sup>n</sup> ndíi, ndíi Àbrahám, te ní cánehe ndíi ðíhí-á<sup>n</sup> sǎ yí<sup>n</sup>ñùhu núú yí<sup>n</sup> ndíi. Te núu nchòhó quídé vǎha-ndo ndècu-ndo te ñá túú yùhú-ndó ñǎ cada ñaha tnàha ñáyiu-ndo xii-ndo, te núu duca<sup>n</sup> quíde vǎha-ndo ndècu-ndo te quíde-ndo datná ní quíde ndíi Sǎrá.

<sup>7</sup> Te nchòhó cue tée ndècu ñadihí-xi ío vǎha cuáha-ndo cuendá nàcuáa cundecu vǎha-ndo ndíhí-yu, te ío vii cáhá<sup>n</sup> ndíhi-ndǒ-yu, chi ñáyiu-á<sup>n</sup> íí-gǎ-yu dàcúxí nchòo cue tée, te duca<sup>n</sup> càda-ndo chí ndíi ndùú-ndó ndùu táhú-ndó cundecu-ndo ndíhi Yá Ndiǒxí, te núu duca<sup>n</sup> na càda-ndo te òré cáhá<sup>n</sup> ndíhi-ndo Yǎ Ndiǒxí te tedóho ñaha-gǎ xii-ndo.

### *Ñáyiu quíde sá vǎha ndòhó-yu*

<sup>8</sup> Te càchí tnúhu tucu-í xii-ndo sǎ ïo cuu ñ<sup>n</sup>nuu-ndo cundecu-ndo, te cundàhú iní tnáhá-ndó ñ<sup>n</sup> ñ<sup>n</sup>-ndo, te cuu iní tnáhá tùcu-ndo nacuáa ndècu-ndo ichi Yá Ndiǒxí, te cuu-ndo ñáyiu ndàhú iní-xi. <sup>9</sup> Te núu ñ<sup>n</sup> sá ñà túú vǎha quíde ñaha ñáyiu xii-ndo, te ñá díú-ní dùca<sup>n</sup> nanchocáva-ndo càda-ndó-yu, àdi xícuèhé ñáhǎ-yu xii-ndo, te vǎ ná dànchocáva-ndo ðíu-ni tnúhu cuèhé, chi cǎcǎn táhú-ndó núú Yǎ Ndiǒxí cuendá sá ná cǎdá vǎha ñaha-gǎ xii-yu, te duca<sup>n</sup> càda-ndo chí Yá Ndiǒxí ní cáhá<sup>n</sup> ñáhá-gǎ xii-ndo cuendá sá cǎdá vǎha ñaha-gǎ xii-ndo tnáhá-ndó. <sup>10</sup> Te núú tùtú Yǎ Ndiǒxí càchí-xi:

Nchaa ñáyiu cuení cundecu vǎha ndíi nchàa nduu  
nini cundecú-yu ñuyíú-a,

xìni ñuhu-xi sá vǎ cǎhá<sup>n</sup>-yu tnúhu cùtexínu, te ni vǎ dǎcuàndehndé-yu.

11 Te xìni ñuhu-xi duu<sup>n</sup> duu<sup>n</sup> dañá-yu nchaa ichi cuèhé ichi duha, te cadá-yu mee-ni sǎ vǎha, te ío ndùcú-yu nàcuáa cadá-yu cundecu váha-yu ndìhi tnàha ñáyíu-yu te ñi-u-ni duca<sup>n</sup> cànchicú<sup>n</sup> nihnú-yu cadá-yu.

12 Te Yá Ndiǒxí xító-gǎ nchaa ñáyíu quide ndáá núú-gǎ

te tedóho-gǎ nchaa tnúhu cǎhá<sup>n</sup>-yu,

dico nchaa ñáyíu ñá túú cuení cada ndáá, ñáyíu-á<sup>n</sup> ñà túú cùu váha iní-gǎ núú-yu.

Duha cǎchí-xi núú tütú-gǎ.

13 Te vá yǒo níhí ndéé cǎda ñaha xii-o ñ<sup>n</sup> sá ñà túú vǎha te núu mee-ni sǎ vǎha na cǎda-o cundecu-o. 14 Àdi núu ná cúú sǎ ná cǎdá ñaha ñáyíu xii-o sǎ cuendá sá quidé vǎha-o ndècu-o ña, te sá dúcá<sup>n</sup> ná cǎdá ñáhá-yu xii-o cùu-xi ñ<sup>n</sup> sá vǎha sá cúú-xí-ó núú Yá Ndiǒxí. Te na cǎchí tnúhu-í xii-ndo sǎ vǎ yùhú-ndǒ-yu, te ni vǎ cùndìyí-ndó cuendá nchaa sá ná cǎda ñahá-yu xii-ndo. 15 Te nèhe-ndo sá yíñùhu núú Xítóhó Jesucrístú. Te ío cundecu túha-ndo dànehé-ndó ñáyíu véxi ndùcu tnúhu núú-ndó nàcuáa ndùu tnúhu ndee iní ní taxi Xítóhó Jesucrístú ndécú ndìhi-ndo, te cuu vii cuu váha iní-ndó cǎhá<sup>n</sup> ndìhi-ndǒ-yu, te cǎhá<sup>n</sup>-ndó núú-yu mee-ni tnúhu yíñùhu nacuáa cùu váha iní Yá Ndiǒxí. 16 Te ío cada váha-ndo cùndecu-ndo cuendá sá vǎ cùndìyí-ndó, te núu duca<sup>n</sup> na cǎda-ndo, te nchaa ñáyíu xǐcuèhé ñáhá xii-ndo cuendá sá quidé vǎha-ndo ndècu-ndo ichi Xítóhó Jesucrístú quendóo canúú-yu ndìhi nchaa tnúhu cǎhá<sup>n</sup>-yu,

chi nchòhó quidé vǎha-ndo ndècu-ndo. <sup>17</sup> Te váha-gá sá ndóhó-ó cuendá sá quidé-ó sǎ vǎha te núu mee Yǎ Ndiǒxí duca<sup>n</sup> cuení-gá cunduu, te ñá díú sǎ ndóhó-ó cuendá sá ñà túú quide-o sá vǎha.

<sup>18</sup> Te Xítóhó Jesucrístú ní xíhí-gá sá cuendá nchaa cuéchi nchaa nchoo ñǎyiu ndècu ñuyíú-a, te #<sup>n</sup> xito-ni duca<sup>n</sup> ñí xíhí-gá te duca<sup>n</sup> te vá cùú tnàhí-gá, te mee-gǎ cúú-gǎ Yaá ñá túú tnàhí cuéchi-xi, te duca<sup>n</sup> ñí ndoho-gá cuendá nchaa cuéchi ñáyiu ndècu ñuyíú-a ñáyiu ñá túú cuení cada ndáá núú Yǎ Ndiǒxí, te duca<sup>n</sup> ñí cuu cuendá sá núcúndecu váha-yu núú Yǎ Ndiǒxí te núu na quíndáá iní ñáhǎ-yu xii-gá. Te mee-gǎ ní xíhí-gá dico Espíritú-gá chi ní xíndecu-ni-xi, <sup>19</sup> te Espíritú-gá ní sáhá<sup>n</sup>-xi ní cáhá<sup>n</sup>-xi tnúhu Yá Ndiǒxí núú nchaa espíritú ñáyiu ndècu núú ùhú núú ndàhú. <sup>20</sup> Te ñáyiu-á<sup>n</sup> cúú ñáyiu ní xíndecu ndéé sanaha cǔtnàhá ní xíndecu ndíi Nǒé, chi ñáyiu-á<sup>n</sup> ïo ní quide sàá iní-yu núú Yǎ Ndiǒxí. Te Yá Ndiǒxí ïo váha iní-gá, chi ní dácácá-gǎ nduu ñí xíndecuu ndíi Nǒé ní cadúha ndíi bàrcú cuendá ndétú-gǎ ndixi cuéchi iní-yu sá ñà túú quide váha-yu ndécú-yu ni cùu. Te dàvá-á<sup>n</sup> ñí ndaa ndute ñuyíú te ní cácu úná duha ná tnàhá ñáyiu, chi ní quée-yu xití bàrcú-á<sup>n</sup>, te ñá túú ní cǎhá-yu. <sup>21</sup> Te sá dúcá<sup>n</sup> ñí cácu ñáyiu úná-á<sup>n</sup> ñà túú ní cǎhá-yu ndute ní ndaa ñuyíú dàvá-á<sup>n</sup>. Te xǎ<sup>n</sup> quée-xí sǎ cuándute ñáyiu vitna, te naníhí tàhú-yu te núu na quíndáá iní-yu tnúhu ndáá tnúhu Yá Ndiǒxí. Te ñá díú sǎ cuándute-o te nduu ndoo nduu nine yiqui cùñú-ó te naníhí tàhú-ó, chi xìni ñuhu-xi nǎhmá-ó núú Yǎ Ndiǒxí nchaa yíca cuéchi-o, te nduu ndoo nduu nine iní-ó,

te duca<sup>n</sup> te naníhí tàhú-ó, chi Xítohó Jesucrìstú ní xíhí-gá cuendá-ó te ní ndoto-gá. <sup>22</sup> Te Yaá-án cuãndaa-gá andiu, te ní ngóo-gá xio cùha Yá Ndiöxí, te tàxi tnuní-gá nchaa espíritú cúnùu ndìhi nchaa dava-gá cue espíritú xínú cuèchi.

## 4

### *Cada-o nàcuáa cuini méé Yă Ndiöxí*

<sup>1</sup> Te Xítohó Jesucrìstú ní ndoho-gá cútnàhá ní xíndecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi nchaa ñáyiu ndòho nándi sá ndóhó cuendá-gá dàñá-yu nchaa sá cuèhé sá dúhá. <sup>2</sup> Te duca<sup>n</sup> ñà túú-gă ndécũ-yu ichi cuèhé ichi duha, chi mee-nă nàcuáa càhá<sup>n</sup> Yă Ndiöxí quidě-yu ndècú-yu ñuyíú-a. <sup>3</sup> Te nchòhó sa nàha-ndo sá ïo cuèhé nùú să cuèhé sá dúhá nĩ xóo cada-o cùtnàhá vátá cùndècu-gá-ó ichi Yá Ndiöxí, chi ní xóo cada-o nchàa sá cuèhé sá dúhá cùdíí ìní nchaa ñáyiu ñá túú sàndáá iní tnúhu-gá, te dàvá-á<sup>n</sup> nĩ xóo cada-o nchàa núú să cuèhé sá dúhá, te ní xóo cani cuèhé ní xóo cani duha iní-ó, te ní cuu-o cuè ñáyiu quihu, te ní xóo cundecu-o vico núú nĩ xóo cada-o nchàa sá ñà túú văha, te ní xóo níhí tnáhá-ó ndìhi nchaa tnaha quihu-o, te ní xóo chiñuhu-o nchàa sá càchí-yu cùu ndióxí te ñá ndáá sá ndiöxí cúú nchàa xíă<sup>n</sup>, te nándi-gá nchaa sá cuèhé sá dúhá nĩ xóo cada-o dàvá-á<sup>n</sup>. <sup>4</sup> Te ñáyiu-á<sup>n</sup> cùññhu-yu vitna sá ñà túú-gă nihí tnáhá-ó ndìhí-yu cada-o nchàa sá cuèhé sá dúhá quidě-yu, te xíă<sup>n</sup> càhá<sup>n</sup> cuèhé-yu cuendá-ó vitna. <sup>5</sup> Dico sáá nduu te ñáyiu-á<sup>n</sup> năhmá-yu nchaa sá quidě-yu núú Xítohó Jesucrìstú, chi diu-gá sa ndècu túha-gá sá cádá ndăá-gá cuèchi nchaa ñáyiu sa ní xíhí, ndìhi

cuéchi nchaa ñáyiu xĩndecu vǐvú. <sup>6</sup> Te cue ñáyiu sa ní xíhí ní xĩndedóho tnúhu Xítohó Jesucristú, te cuéi ní xíhí-yu dàtná xihí dava-gá ñáyiu, dico espíritú-yu chí ní nduu táhú-xi ndècu váha-xi dàtná ndécú Yá Ndiõxí.

<sup>7</sup> Te vitna ta cùyatni danaa Yá Ndiõxí ñuyíú-a núu xíá<sup>n</sup> ío váha cuáha-ndo cuèndá nàcuáa cun-decu-ndo, te cáhá<sup>n</sup> ndìhi-ndo-gá. <sup>8</sup> Te xìni ñuhu-xi sá ïo cuu iní tnáhá-ndó ì<sup>n</sup> ì<sup>n</sup>-ndo, chí núu duca<sup>n</sup> na cùu iní tnáhá-ndó ì<sup>n</sup> ì<sup>n</sup>-ndo, te vá cání-gá iní-ndó càda cuendá-ndó nchàa sá ñà túú vǎha quide ñaha ñáyiu xii-ndo, <sup>9</sup> te nchòhó ñáyiu xĩndecu vehe-xi cuáha nùu-ndo vehe xii cue ñáyiu ñùhu ichi na ndetatú-yu, te ío váha cuu iní-ndó dùca<sup>n</sup> cada-ndo.

<sup>10</sup> Te Yá Ndiõxí ní taxi-gá ndí díí<sup>n</sup> nùú táhú ndécú ndìhi-ndo ì<sup>n</sup> ì<sup>n</sup>-ndo, te nàcuáa ndùu táhú nǐ nduu táhú-ndó ì<sup>n</sup> ì<sup>n</sup>-ndo te duca<sup>n</sup> chĩndee tnaha-ndo, te vá dáñá ndèé-ndó càda-ndo nchaa nacuáa tàuchiu<sup>n</sup> Yá Ndiõxí cada-ndo, te chĩndee ñàha-gá xii-ndo.

<sup>11</sup> Te dava nchòhó ñáyiu càhá<sup>n</sup> tnúhu Yá Ndiõxí núú ñáyiu, xìni ñuhu-xi cáhá<sup>n</sup>-ndó nàcuáa ndùu tnúhu-gá núú-yu, te dava nchòhó ñáyiu quide nchaa núú chiu<sup>n</sup> chĩndee tnaha ñáyiu-xi, xìni ñuhu-xi cada-ndo sá Yá Ndiõxí chĩndèe ñaha-gá xii-ndo, te duca<sup>n</sup> càda-ndo nchaa núú sǎ vǎha, chí Xítohó Jesucristú tnáhá-gá chĩndèe ñaha-gá xii-ndo, te duca<sup>n</sup> ïo cuu càhnu Yá Ndiõxí. Te vitna tàú-ó càhá<sup>n</sup>-ó sǎ ïo càhnu cuu Xítohó Jesucristú, chí diu-gá cúnùu-gá nchaa nduu nchaa quíú, te duca<sup>n</sup> na cùnduu.

*Ndoho tnahá-ó cùndecu-o ichi Xítohó Jesucristú*

12 Te nchòhó ñáyiú ío cùu iní-í, vá cùñũhu-ndo sã ïo ndòho-ndo ndecu-ndo ichi Xítohó Jesucristú, chi sá dúcá<sup>n</sup> ndòho-ndo-á<sup>n</sup> cùtnùnì ndisa sá sàndáá iní-ndó-gã, te vá cánì ìní-ndó nã cuendá duca<sup>n</sup> ndòho-ndo. 13 Chi da cudíí ìní-ndó te núu ndòho-ndo datná ní ndoho Xítohó Jesucristú, te duca<sup>n</sup> sũúní cùdíí ìní-ndó òré ná quèxi tucu-gá ñuyíú-a te dàvá-á<sup>n</sup> quiní-ndó sã ïo càhnu cuu-gá. 14 Te núu xĩcuèhé ñáhá ñáyiú ndècu ichi cuehé ichi duha xii-ndo cuendá sá ndécú-ndó ìchi Xítohó Jesucristú, te xiã<sup>n</sup> cúú-xí ì<sup>n</sup> sá vãha sá cúú-xí-ndó nũú-gã, te duca<sup>n</sup> chi Espíritú Yã Ndiõxí sá ïo cùnuu ndecu ndìhi ñaha-xi xii-ndo, te nchaa ñáyiú ndècu ichi cuehé ichi duha-ã<sup>n</sup> càhá<sup>n</sup> cuèhé-yu cuendá Xítohó Jesucristú, dico nchòhó càchí-ndó sã ïo càhnu cuu-gá. 15-16 Te núu nchòhó dándòho ñaha ñáyiú xii-ndo sã cuendá sá ndécú-ndó ìchi Xítohó Jesucristú ñã, te vá cúú càhá<sup>n</sup> núú-ndó, chi ndacá<sup>n</sup> táhú-ndó nũú Yã Ndiõxí cuendá sá ndécú-ndó ìchi-gá. Te cuèi ndòho-ndo ndecu-ndo, dico ñã túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quède cuehé quidé dùha, te ni ñà túú cùu-ndo ñáyiú chindee tnúhu tnàha ñáyiú-xi ì<sup>n</sup> sá ñà túú tàú-ndó càda-ndo.

17 Te vitna sa quèsaha Yã Ndiõxí cada ndáá-gá nchaa sá quidé nchò ñáyiú ndècu ndìhi-gá, te núu duca<sup>n</sup> te ndèé-gá cada-gá nchaa ñáyiú ñã túú sàndáá iní ñáhá xii-gá òré ná sàá nduu dùca<sup>n</sup> cada ñaha-gá xií-yu. 18 Te nchòhó xìnì-ndó sã ñáyiú quède vãha ndècu ichi Xítohó Jesucristú ndòho tnahá-yu ndécú-yu, dico sáá nduu te nduu táhũ-yu cundecú-yu ndìhi-gá. Te núu duca<sup>n</sup> ndòho nchaa



ñáyiú quide váha ña, ¿te nása-gá yáha nchaa ñáyiú ndècu ichi cuehé ichi duha na sàá nduu càda ndáá Yă Ndiöxí cuéchi-yu-i? <sup>19</sup> Te nchaa nchòhó ñáyiú ndòho nacuáa cuíní Yă Ndiöxí xini ñuhu-xi sá vă dáñá ndéé-ndó càda váha-ndo cùndecu-ndo, te ío quindáá iní-ndó să xító ñàha-gá xii-ndo. Te ñiu-gá cúú-gă Yaá ní cadúha ñaha xì-o, te quide-gá ì<sup>n</sup> sá càhá<sup>n</sup>-gá.

## 5

### *Nàcuáa tàú-xi cada ñáyiú ndècu ichi Xítóhó Jesucristú*

<sup>1</sup> Te yúhú càhá<sup>n</sup>-í dóho nchaa nchòhó cue téé yíndaha nchaa dava-gá ñáyiú ndècu ichi Xítóhó Jesucristú, chi tnàhá yúhú yíndàha-í ñáyiú ndècu ichi-gá, te sàndáá iní-í tnúhu-gá, te ní xiní-í nchaa nàcuáa ní ndoho-gá, te sáá nduu te tnàhá-í cunuu-í ndìhi-gá. <sup>2</sup> Te ío canehe cuèndá-ndó nchàa ñáyiú ndècu ichi Yá Ndiöxí yíndàha-ndo te cada-ndo dàtná quidé cuè toli, chi cue téé-á<sup>n</sup> ïo váha xìto-güedé mběé-güedě. Te canehe cuèndá-ndö-yu sá cúú ìní méé-ndó te ñá díú să ìó ì<sup>n</sup> ñáyiú cada yica ñàha xii-ndo, te ni ñà díú să cuíní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi ñuca<sup>n</sup> cuíní Yă Ndiöxí cunduu. <sup>3</sup> Te vá cadá-ndó să ïo cùnuu-ndo núŷ-yu, chi cada-ndo mée-ni sá vâha cuèndá ñuca<sup>n</sup> cànchicú<sup>n</sup> nihnú-yu cadá-yu tnàhá-yu. <sup>4</sup> Te òré ná quíxí tùcu Xítóhó Jesucristú Yaá néhé cuèndá ñàhá xì-o nchaa-o ñuyíú-a, te taxi-gá să ïo váha nduu táhú-ó, te cunuu-o ndìhi-gá ni caa ni quíhí<sup>n</sup>.

<sup>5</sup> Te nchòhó ñáyiú ndècu ichi Xítóhó Jesucrìstú càhá<sup>n</sup>-í dóho-ndo sã ïo quíndáá iní-ndó cuè téé yìndaha ñaha xii-ndo nacuaá ndècu-ndo ichi-gá, te nchaa-ndo tàú-ndó quíndáá iní tnáhá-ndó ì<sup>n</sup> ì<sup>n</sup>-ndo, chi núú tütú Yã Ndiöxí càchí-xi ì<sup>n</sup> xichi:

Nchaa ñáyiú quide cahnu mee-xi ñá túú cùu váha iní Yã Ndiöxí núú-yu,

dico nchaa ñáyiú ndàhú iní-xi te chindee ñaha-gá xii-yu.

Duha càchí-xi núú tütú-gá. <sup>6</sup> Te dañá-ndo mèe-ndo núú ndáhá Yã Ndiöxí, chi mee-gã ío cùnuyu-gá. Te núú duca<sup>n</sup> na càda-ndo, te sáá nduu te cada nínu ñaha-gã xii-ndo. <sup>7</sup> Te nchaa sá yãha-ndo ndècu-ndo te nachihi-ndo ndàha Yá Ndiöxí, chi mee-gã xító ñàha-gá xii-ndo.

<sup>8</sup> Te ío váha cuáha-ndo cuendá cundecu-ndo, te quihí iní-ndó chi sácuíhná xicá cùu-xi cuiní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ì<sup>n</sup> quiti déé<sup>n</sup> xicá ndùcu sá cáxí-xí. <sup>9</sup> Te ío quíndáá iní-ndó Xítóhó Jesucrìstú, te vá dáñá-ndó mèe-ndo dandahú ñáhá sàcuíhná xii-ndo càda-ndo nacuaá cuiní-xi, chi ñaha-ndo sá ncháá ñáyiú ndècu ichi Xítóhó Jesucrìstú xíndecu nihí ñuyíú ndóhõ-yu dàtná ndóhó nchòo ndecu-o ichi-gá. <sup>10</sup> Dico sacú-ni nduu duha cundoho-o te dàtnùní ñá túú-gã ná cumání-ó cundecu-o núú Yã Ndiöxí, te dàvá-á<sup>n</sup> vã cání ì<sup>n</sup> cani úú iní-ó cundecu-o ichi-gá. Te ío-gá ngúndecu ndihí-o tnùhu ndee ìní cada-o nchàa nacuaá càhá<sup>n</sup>-gá, te duca<sup>n</sup> càda-o chi mee Yã Ndiöxí ío chindee ñàha-gá xii-o, te ñu-ni Yaá-ã<sup>n</sup> ïo cùu iní ñáhá-gã xii-o, chi ní cáhá<sup>n</sup> ñáhá-gã xii-o cundecu-o núú ïo váha càa ndecu-gá

cundecu-o nì caa ni quíhí<sup>n</sup>, te duca<sup>n</sup> nǐ quide-gá chi ní sándáá iní-ó Xítóhó Jesucristú. <sup>11</sup> Te ío ndacá<sup>n</sup> táhú-ó núú Yă Ndiǒxí chi ío cǎhnu cuu-gá, te cùnuu-gá nchaa nduu nchaa quíú. Te duca<sup>n</sup> na cùnduu.

*Tnúhu ndéé núú nǐ ndíhi-ná*

<sup>12</sup> Te té Silvanú xìní-í sá cúú-dě ì<sup>n</sup> tée quide ndáá ndécú ìchi Xítóhó Jesucristú, te diu-dé ní cáhá<sup>n</sup> ndàhú-í núú-dě ní tee-dé ì<sup>n</sup> ǔú tnúhu sá nǐ xáha<sup>n</sup>-í xii-dé núú tütú-a cuèndá daquixi-í ndaha-ndo, te núú tütú-a cǎchí tnúhu ndáá-í xii-ndo sǎ Yă Ndiǒxí ío cùu iní ñáhá-gǎ, te chìndee ñaha-gá xii-ndo ndècu-ndo, te cǎchí tnúhu tucu-í xii-ndo sǎ ïo quíndáá iní-ndó sǎ ndàá duca<sup>n</sup> quide ñaha-gá xii-ndo.

<sup>13</sup> Te cue ñáyiu ndècu ñúú Babiloniá, ñáyiu ndècu ìchi Yă Ndiǒxí, diu-ni ñáyiu ní cachí Yă Ndiǒxí sá nánìhí tàhú dàtná cúú nchòhó, ío quide ndee iní ñáhǎ-yu xii-ndo, te tnáhá té Mǎcú tée cùu datná ì<sup>n</sup> déhe-í quidé ndèe iní ñáhá-dě xii-ndo. <sup>14</sup> Te ndíhi tnúhu yíñùhu cada ndee iní tnáhá-ndó ì<sup>n</sup> ì<sup>n</sup>-ndo, te xicá<sup>n</sup> táhù-í núú Yă Ndiǒxí sá ïo na cùndecu nahi nchaa nchohó ñáyiu ndècu ndíhi Xítóhó Jesucristú. Te duca<sup>n</sup> na cùnduu. Te ío chí cǎdá ndèe iní-nǎ vítna.

**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 3 Mar 2023 from source files  
dated 29 Jan 2022

872f7754-0986-5ecd-a059-925a708a6939